

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI KHAMIS, 10 MAC 2016, PUKUL 10.00 PAGI

Bil. 4

PERTANYAAN-PERTANYAAN BAGI JAWAB LISAN

1. PR-1341-L72481
Puan Hajah Normala binti Abdul Samad [Pasir Gudang] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan berapakah kes kesalahan di bawah Akta Kawalan Harga dan Anti Pencatutan 2011 yang telah diselesaikan dan apakah tindakan yang dikenakan kepada mereka serta apakah langkah-langkah atau dasar “*affirmative*” yang akan diambil oleh Kementerian untuk menangani masalah kenaikan harga barang oleh peniaga yang tamak.
2. PR-1341-L73164
Tuan Wong Tien Fatt @ Wong Nyuk Foh [Sandakan] minta **MENTERI KEWANGAN** menyatakan adakah Kerajaan Persekutuan menimbang untuk semak semula kadar GST memandangkan pendapatan Kerajaan semakin menurun akibat kejatuhan harga minyak antarabangsa.
3. PR-1341-L73491
Datuk William @ Nyallau anak Badak [Lubok Antu] minta **MENTERI KEMAJUAN LUAR BANDAR DAN WILAYAH** menyatakan selepas kajian semula Bajet 2016, berapakah peruntukan bekalan air terawat yang masih diagihkan kepada kawasan Parlimen P203 Lubok Antu.
4. PR-1341-L73507
Dato' Kamarudin bin Jaffar [Tumpat] minta **MENTERI PERDAGANGAN ANTARABANGSA DAN INDUSTRI** menyatakan setakat manakah dasar ASEAN Economic Community yang bermula pada tahun ini telah memanfaatkan ekonomi Malaysia.
5. PR-1341-L71660
Dato' Wira Othman bin Abdul [Pendang] minta **MENTERI PEMBANGUNAN WANITA, KELUARGA DAN MASYARAKAT** menyatakan adakah Kementerian membuat pendaftaran orang-orang gelandangan seluruh negara dan apakah bentuk bantuan untuk mereka.

6. PR-1341-L72575
Tuan V. Sivakumar [Batu Gajah] minta **MENTERI DALAM NEGERI** menyatakan jumlah kes jenayah rumah tangga atau keganasan domestik yang dilaporkan sepanjang tahun 2014, 2015 dan 2016. Berapakah kes yang dituduh di mahkamah dan telah diambil tindakan setakat ini. Apakah langkah-langkah Kementerian untuk menangani masalah jenayah rumah tangga atau keganasan domestik ini.
7. PR-1341-L73269
Tuan Haji Hasbi bin Haji Habibollah [Limbang] minta **PERDANA MENTERI** menyatakan bilakah pembinaan "*high level tank*" di Jalan Ulu Pendaruan yang telah diluluskan oleh pihak ICU, JPM bernilai RM4 juta akan dimulakan untuk memastikan air yang dirawat dapat dibekalkan ke kawasan di sepanjang Ulu Pandaruan dalam tahun ini.
8. PR-1341-L71682
Dr. Che Rosli bin Che Mat [Hulu Langat] minta **MENTERI KESIHATAN** menyatakan adakah Kementerian berhasrat melatih remaja tempatan dengan kerjasama Kementerian Pembangunan Wanita, Keluarga dan Masyarakat bagi melahirkan pembantu rumah dan pembantu tadika yang profesional dan mahir dalam pengurusan kesihatan masyarakat.
9. PR-1341-L71692
Tuan Wilson Ugak Kumbong [Hulu Rajang] minta **MENTERI DALAM NEGERI** menyatakan status pondok sempadan di Long Singgut dan di Long Busang, Belaga.
10. PR-1341-L72494
Dr. Ong Kian Ming [Serdang] minta **MENTERI KERJA RAYA** menyatakan senarai semua projek lebuhraya yang sedang dirancang ataupun yang telah mendapat kelulusan dari pihak berkuasa mengikut jenis lebuhraya (bertol atau tidak), nama syarikat konsesi (jika berkenaan), tempoh konsesi, tarikh luput konsesi, jumlah jarak lebuhraya dan kos pembinaan yang dijangka.
11. PR-1341-L73048
Dato' Shamsul Anuar bin Haji Nasarah [Lenggong] minta **MENTERI PERDAGANGAN ANTARABANGSA DAN INDUSTRI** menyatakan dengan kejatuhan nilai ringgit pada waktu ini adakah ia akan menyebabkan pelabur asing hilang keyakinan untuk melabur di dalam negara.
12. PR-1341-L73553
Tuan Charles Anthony Santiago [Klang] minta **MENTERI KESIHATAN** menyatakan kesudian Kerajaan untuk melaksanakan sistem kawalan harga untuk semua ubat-ubatan serta perkhidmatan kesihatan di hospital Kerajaan dan swasta di Malaysia. Apakah status pelaksanaan Sistem 1-Care di Malaysia.
13. PR-1341-L72841
Tuan Ir. Shahrudin bin Ismail [Kangar] minta **MENTERI PELANCONGAN DAN KEBUDAYAAN** menyatakan apakah tahap pembangunan yang dirangka oleh Kementerian dalam meningkatkan lagi promosi destinasi pelancongan di negeri Perlis yang kian suram dan secara tidak langsung mampu menggalakkan lebih banyak pelaburan.

14. PR-1341-L72554
Puan Alice Lau Kiong Yieng [Lanang] minta **MENTERI KERJA RAYA** menyatakan sama ada Kerajaan berhasrat untuk membekalkan lampu jalan di seluruh Jalan Tun Ahmad Zaidi Adruce yang terletak di kawasan Parlimen Lanang yang sering berlaku kemalangan jalan raya disebabkan keadaan gelap selama ini. Jila tidak, kenapa. Jika ya, bila.
15. PR-1341-L71900
Tuan Anuar bin Abd. Manap [Sekijang] minta **PERDANA MENTERI** menyatakan jumlah individu serta bentuk tindakan yang telah diambil oleh Jabatan Peguam Negara terhadap individu yang telah membocorkan rahsia negara di bawah Akta Rahsia Rasmi untuk tempoh masa 5 tahun yang lalu.
16. PR-1341-L73307
Dr. Michael Teo Yu Keng [Miri] minta **MENTERI KESIHATAN** menyatakan apakah usaha-usaha yang dibuat untuk menangani masalah kekurangan hospital di Sabah dan Sarawak, daripada segi bilangan hospital, peralatan hospital dan kepakaran.
17. PR-1341-L73354
Dato' Ar. Wan Mohammad Khair-il Anuar bin Wan Ahmad [Kuala Kangsar] minta **PERDANA MENTERI** menyatakan berapakah jumlah pembocoran maklumat sulit Kerajaan yang telah berlaku sepanjang tahun 2010 hingga 2015. Apakah perancangan Kerajaan dalam menangani isu ini.
18. PR-1341-L73577
Tuan Oscar Ling Chai Yew [Sibu] minta **MENTERI PENDIDIKAN** menyatakan jumlah kos yang terlibat dalam pergantian buku teks sejarah tahun 6 yang ada kesilapan, senaraikan kos yang terlibat. Mengapakah buku teks Bahasa Melayu SK yang dihantar kepada sekolah SJK tidak perlu dikembalikan, berapakah kos yang terlibat dalam percetakan buku-buku itu.
19. PR-1341-L72987
Dato' Seri Tiong King Sing [Bintulu] minta **MENTERI BELIA DAN SUKAN** menyatakan :-
- (a) adakah pihak Kementerian berhasrat untuk menyalurkan bantuan kewangan (geran) kepada persatuan/ pertubuhan sukan yang bergerak cukup aktif dalam masa terdekat ini bagi setiap kawasan Parlimen; dan
 - (b) adakah pihak Kementerian mempunyai rancangan untuk menubuhkan agensi pemantau bagi memastikan persatuan/ pertubuhan sukan ini benar-benar bergerak cukup aktif dan memperoleh kejayaan pada masa akan datang.
20. PR-1341-L73501
Dato' Kamarudin bin Jaffar [Tumpat] minta **MENTERI PERTAHANAN** menyatakan apakah rasional Malaysia menyertai pakatan tentera negara-negara Islam di bawah pimpinan Arab Saudi yang bertujuan kononnya menentang ekstremis.

21. PR-1341-L72695
Dato' Abd. Aziz bin Haji Sheikh Fadzir [Kulim Bandar Baharu] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan adakah Kementerian telah mencapai sasaran penyediaan rumah mampu milik dalam RMK-10 yang lalu dan jika tidak, berapakah jumlah yang masih belum dicapai. Melalui RMK-11, Kementerian meletakkan sasaran sebanyak 653,000 rumah mampu milik akan dicapai dan adakah ia merupakan sasaran yang baru ataupun kesinambungan daripada lebihan RMK-10 yang masih belum dicapai.
22. PR-1341-L71936
Dato' Mansor bin Othman [Nibong Tebal] minta **MENTERI PERTAHANAN** menyatakan usaha-usaha yang dilakukan oleh Kementerian setakat ini untuk mewujudkan peluang-peluang pekerjaan dan menyediakan unit-unit kediaman yang selesa kepada veteran angkatan tentera yang telah banyak berkorban mempertahankan kedaulatan negara.
23. PR-1341-L71835
Datuk Aaron Ago anak Dagang [Kanowit] minta **MENTERI SUMBER ASLI DAN ALAM SEKITAR** menyatakan apakah langkah serta usaha yang diambil oleh pihak Kementerian dalam memperkasakan lagi kesedaran terhadap penjagaan alam sekitar di Malaysia terutamanya pencemaran sungai kerana air adalah sumber utama kehidupan.
24. PR-1341-L72091
Raja Dato' Kamarul Bahrin Shah [Kuala Terengganu] minta **MENTERI PERTANIAN DAN INDUSTRI ASAS TANI** menyatakan apakah langkah-langkah dan tindakan Kementerian untuk menyediakan nelayan-nelayan negara kita bagi menghadapi saingan hebat daripada tangkapan laut negara-negara asing melalui perjanjian TPPA.
25. PR-1341-L71860
Tuan Khoo Soo Seang [Tebrau] minta **MENTERI DALAM NEGERI** menyatakan adakah Kementerian melaksanakan pemantauan berkala bagi membanteras aktiviti perjudian atas talian atau "*online betting*" kerana aktiviti sedemikian berada pada tahap yang amat membimbangkan dan adakah Kementerian bercadang untuk menggubal undang-undang baru bagi menggantikan Akta Rumah Judi Terbuka 1953 yang sudah lama dan tidak relevan dengan hukuman yang dikenakan adalah terlalu ringan.
26. PR-1341-L73312
Dato' Dr. Tan Kee Kwong [Wangsa Maju] minta **MENTERI KOMUNIKASI DAN MULTIMEDIA** menyatakan apakah terdapat langkah diambil kepada pengusaha perjudian yang kerap menghantar SMS kepada pengguna telefon bimbit.
27. PR-1341-L72041
Dato' Noraini binti Ahmad [Parit Sulong] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan status pelaksanaan pengasingan sisa pepejal bagi setiap premis dan rumah dan apakah langkah yang dijalankan oleh pihak Kementerian untuk memudah dan menjayakan kempen ini.

28. PR-1341-L72372
Tuan Tony Pua Kiam Wee [Petaling Jaya Utara] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan sebab Syarikat Putra Perdana Development Sdn Bhd (sejak Disember 2012), Iskandar Waterfront Holdings Sdn Bhd, Putra Perdana Construction Sdn Bhd dan Putrajaya Perdana Bhd (sejak Disember 2013) tidak memfailkan penyata kewangan kepada Suruhanjaya Syarikat Malaysia. Apakah tindakan yang telah diambil.
29. PR-1341-L71806
Datuk Jumat bin Idris [Sepanggar] minta **PERDANA MENTERI** menyatakan mengenai permintaan Sabah untuk meminta lebih autonomi sebagaimana yang tertulis dalam Perjanjian Malaysia 1963 dan juga hak 40% hasil Sabah yang hendaklah dikembalikan semula.
30. PR-1341-L72649
Dato' Ngeh Koo Ham [Beruas] minta **MENTERI KEWANGAN** menyatakan kenapa harga petrol RON 95 dijual pada kadar RM1.75 seliter apabila harga pasaran petroleum hanya pada kadar lebih kurang RM0.78 seliter iaitu apabila harga petroleum adalah pada harga USD28 satu tong (*barrel*).
31. PR-1341-L73322
Dato' Othman bin Aziz [Jerlun] minta **MENTERI PERTANIAN DAN INDUSTRI ASAS TANI** menyatakan adakah produk pertanian tempatan mampu memenuhi penawaran dan sejauh manakah kesediaan petani tempatan dalam merealisasikan pasar belian terus hasil pertanian FAMA atau MyFarm Outlet yang mensasarkan harga jualan 5%-20% lebih rendah daripada harga pasaran berdasarkan pengumuman "11 Langkah Pengubahsuaian Bajet 2016" yang diumumkan oleh Perdana Menteri.
32. PR-1341-L72064
Tuan Tan Kok Wai [Cheras] minta **MENTERI KEWANGAN** menyatakan bagaimana Kerajaan berjimat memandangkan hasil semakin berkurangan. Apakah langkah-langkah yang diambil oleh Kerajaan untuk menjadi lebih berhemah dalam berbelanja terutamanya untuk bekalan dan perkhidmatan.
33. PR-1341-L73469
Tuan Haji Ahmad Nazlan bin Idris [Jerantut] minta **MENTERI PERDAGANGAN ANTARABANGSA DAN INDUSTRI** menyatakan kesan kemasukan syarikat multinasional antarabangsa terhadap industri utama negara selepas menandatangani TPPA.
34. PR-1341-L72613
Puan Kasthuriraani a/p Patto [Batu Kawan] minta **MENTERI KESIHATAN** menyatakan adakah Kerajaan serius untuk membina Hospital Kerajaan di kawasan Batu Kawan, Pulau Pinang memandangkan Batu Kawan akan menjadi 'bandar satelit' dalam masa terdekat dan di Lawas, Sarawak berikutan kenyataan Kerajaan untuk membinanya. Jika ya, bilakah kerja-kerja pembinaan ini akan bermula dan jika tidak, sila nyatakan mengapa.

35. PR-1341-L71791
Datuk Haji Datu Nasrun bin Datu Mansur [Silam] minta **PERDANA MENTERI** menyatakan apakah langkah dan usaha yang telah diambil oleh Kementerian dalam meningkatkan taraf hidup isi rumah B40 terutama dalam berdepan dengan peningkatan kos sara hidup.
36. PR-1341-L73226
Tuan Ahmad Marzuk bin Shaary [Bachok] minta **PERDANA MENTERI** menyatakan apakah pendirian Kerajaan berkenaan bantahan yang disuarakan oleh pemandu teksi terhadap perkhidmatan Uber dan Grab Car yang menyebabkan pendapatan mereka terjejas teruk.
37. PR-1341-L71969
Puan Teresa Kok Suh Sim [Seputeh] minta **MENTERI DALAM NEGERI** menyatakan daripada jumlah 1.5 juta pekerja Bangladesh yang akan dibawa masuk ke Malaysia, berapakah jumlah majikan yang memerlukan mereka, di sektor-sektor manakah mereka akan ditempatkan, dan di negeri manakah mereka akan bekerja.
38. PR-1341-L72099
Tuan Zairil Khir Johari [Bukit Bendera] minta **MENTERI KOMUNIKASI DAN MULTIMEDIA** menyatakan jumlah cukai berganda (*double taxation*) yang dikutip melalui SST dan GST daripada kredit prabayar telefon bimbit yang dibeli sebelum 1 April 2015 dan yang tidak digunakan sehingga November 2015 apabila GST dikutip bagi setiap panggilan.
39. PR-1341-L73031
Tuan Loke Siew Fook [Seremban] minta **PERDANA MENTERI** menyatakan berapakah pelajar yang telah ditawarkan biasiswa JPA tetapi tidak menerima tawaran tersebut ekoran daripada keputusan Kerajaan untuk tidak menaja 744 pelajar lepasan STPM dan A-Levels ke luar negara.
40. PR-1341-L73378
Dr. Tan Seng Giaw [Kepong] minta **MENTERI KEWANGAN** menyatakan kriteria yang digunakan untuk menyemak peruntukan bagi Kementerian-kementerian. Bagaimana peruntukan perkhidmatan yang penting dikekalkan.
41. PR-1341-L72518
Tuan Ramkarpal Singh a/l Karpal Singh [Bukit Gelugor] minta **MENTERI SUMBER MANUSIA** menyatakan berapakah jumlah kos yang dipersetujui antara Kerajaan Bangladesh dan Kerajaan Malaysia untuk mengeluarkan permit pekerja asing untuk setiap satu bagi 1.5 juta pekerja Bangladesh yang dicadangkan untuk dibawa masuk ke Malaysia kelak.
42. PR-1341-L72548
Puan Alice Lau Kiong Yieng [Lanang] minta **MENTERI SUMBER ASLI DAN ALAM SEKITAR** menyatakan rancangan Kerajaan untuk menangani masalah banjir dan banjir kilat (*flash flood*) yang sering berlaku di Sibu terutama di kawasan Sentosa, Tekam, Lanang, Hua Kiew dan sebagainya yang berada di kawasan Parlimen Lanang.

43. PR-1341-L71832
Tuan M. Kulasegaran [Ipoh Barat] minta **MENTERI PENDIDIKAN** menyatakan :-
- (a) mengapakah kebanyakan sekolah kebangsaan telah gagal untuk menyediakan guru Cina dan Tamil untuk mengajar bahasa masing-masing; dan
 - (b) adakah Kerajaan bersedia dan berhasrat untuk melatih serta menyediakan guru yang berkelayakan untuk mengajar bahasa Cina di sekolah-sekolah Tamil. Jika tidak kenapa.
44. PR-1341-L73069
Tuan Mohamed Hanipa bin Maidin [Sepang] minta **MENTERI DALAM NEGERI** menyatakan berapakah jumlah rakyat Malaysia yang telah melepaskan kerakyatan mereka setiap tahun bermula tahun 2010, 2011, 2012, 2013, 2014, 2015 dan 2016 dan apakah alasan-alasan mereka.
45. PR-1341-L72699
Tuan Sim Tong Him [Kota Melaka] minta **MENTERI DALAM NEGERI** menyatakan :-
- (a) jumlah penagih dadah di negara kita sehingga bulan Disember 2015 mengikut setiap negeri; dan
 - (b) bilangan penagih yang ditahan dalam pusat serenti dan berapa orang penagih dapat dipulih dan kembali kepada masyarakat, dan langkah-langkah yang diambil untuk mencegah kegiatan ini.
46. PR-1341-L73441
Dato' Haji Mahfuz bin Omar [Pokok Sena] minta **MENTERI SUMBER MANUSIA** menyatakan berapakah jumlah pekerja asing *Semi Skill* yang diupah oleh syarikat Malaysia terutama sekali dalam bidang IT dan telekomunikasi berbanding pekerjaan graduan Malaysia.
47. PR-1341-L72076
Tan Sri Dato' Seri Abd Khalid bin Ibrahim [Bandar Tun Razak] minta **PERDANA MENTERI** menyatakan pencapaian terkini sasaran penggunaan pengangkutan awam, nisbah kos trafik kepada KDNK serta perincian dan pecahan struktur tambang pengangkutan awam darat di Malaysia seperti teksi, bas, bas ekspres, komuter, keretapi antara bandar, transit rel ringan dan transit massa laju.
48. PR-1341-L72601
Tuan Chua Tian Chang @ Tian Chua [Batu] minta **MENTERI DALAM NEGERI** menyatakan apakah tindakan yang diambil pihak polis untuk mencari mangsa yang diserang Wan Muhammad Azri Wan Deris (Papagomo). Apakah tindakan yang akan diambil sekiranya mangsa tidak dapat ditemui.

49. PR-1341-L73597
Dato' Sri Hasan bin Malek [Kuala Pilah] minta **PERDANA MENTERI** menyatakan mengapa pihak Kementerian tidak membeli atau mengambil alih tanah-tanah yang berhampiran dengan bandar untuk dibina PR1MA agar golongan muda serta mereka yang tidak memiliki rumah, mampu membeli / memiliki rumah melalui pembelian daripada pihak Kerajaan dengan harga yang berpatutan berbanding syarikat pemaju.
50. PR-1341-L72282
Dato' Takiyuddin bin Hassan [Kota Bharu] minta **PERDANA MENTERI** menyatakan perkembangan terkini proses persempadanan semula bahagian pilihanraya bagi seluruh Malaysia yang dijalankan oleh Suruhanjaya Pilihan Raya Malaysia (SPR).
51. PR-1341-L73090
Dato' Dr. Mujahid Yusof Rawa [Parit Buntar] minta **MENTERI PENDIDIKAN TINGGI** menyatakan berapa ramaikah pelajar lepasan SPM dari tahun 2012 hingga kini yang tidak dapat melanjutkan pelajaran mereka di peringkat lebih tinggi dan kenapa.
52. PR-1341-L72875
Datuk Hajah Norah binti Abd Rahman [Tanjong Manis] minta **MENTERI PERTANIAN DAN INDUSTRI ASAS TANI** menyatakan sama ada pihak Kementerian akan menarik balik pembekuan lesen bot nelayan pesisiran pantai di Sarawak memandangkan terdapat nelayan yang mendapat bantuan bot dan enjin sangkut dari Program Bantuan 1AZAM tetapi tidak layak memohon bantuan subsidi minyak nelayan dan elaun sara hidup bulanan.
53. PR-1341-L72213
Tuan Haji Nasrudin bin Hassan [Temerloh] minta **PERDANA MENTERI** menyatakan peruntukan kewangan yang telah diagihkan kepada program-program PERMATA sejak tahun 2007 hingga 2015.
54. PR-1341-L72066
Tuan Tan Kok Wai [Cheras] minta **MENTERI WILAYAH PERSEKUTUAN** menyatakan berapa banyak tapak tanah dengan memberikan butiran lokasi, keluasan dan kegunaan tanah setiap tapak di ibukota yang masih dimiliki oleh DBKL dan nyatakan setiap tanah yang dijual pada tahun 2015 dengan menyebut perincian setiap lokasi, keluasan, harga jualan nama pembeli-pembeli, tujuan pembelian dan adakah tanah dijual secara tender terbuka, jika tidak, mengapa.
55. PR-1341-L72767
Tuan Julian Tan Kok Ping [Stampin] minta **MENTERI KESIHATAN** menyatakan secara terperinci status terkini perancangan pembinaan hospital di Petra Jaya, Kuching dan Sri Aman, Sarawak. Termasuk jumlah perbelanjaan, jangka masa siap, syarikat yang terlibat, jumlah kontrak yang ditawarkan, serta peranan mereka dalam projek tersebut.

56. PR-1341-L72123
Tuan Su Keong Siong [Ipoh Timor] minta **MENTERI PENGANGKUTAN** menyatakan status terkini pengambil-alihan konsesi kamera AES daripada ATES Sdn. Bhd. dan Beta Tegap Sdn. Bhd. Apakah rancangan terkini Kementerian berkenaan perlaksanaan dan penguatkuasaan sistem kamera AES di Malaysia.
57. PR-1341-L72948
Tuan Ignatius Dorell Leiking [Penampang] minta **MENTERI SUMBER ASLI DAN ALAM SEKITAR** menyatakan laporan terkini program mitigasi banjir di daerah Penampang, khususnya peringkat pelaksanaan/ penyiapan dan jumlah peruntukan yang terlibat dari tarikh pelaksanaan hingga bulan Februari 2016 dan jika ada rancangan yang berkaitan dengan mitigasi banjir di Moyog dan Kepayan, Penampang.
58. PR-1341-L72794
Tuan R. Sivarasa [Subang] minta **MENTERI KOMUNIKASI DAN MULTIMEDIA** menyatakan hasil kutipan daripada pelaksanaan Cukai Barangan dan Perkhidmatan (GST) sejak permulaannya pada 1 April 2015 dan sama ada Kerajaan setuju GST boleh dikecualikan bagi top-up telefon bimbit serta penggunaannya.
59. PR-1341-L73568
Tuan Er Teck Hwa [Bakri] minta **MENTERI DALAM NEGERI** menyatakan bilangan warganegara yang telah disenaraihitamkan dan dilarang daripada meninggalkan negara mengikut negeri, alasan seperti pinjaman pendidikan, bankrap, alasan keselamatan dan lain-lain mengikut tahun 2011 hingga 2016.
60. PR-1341-L73277
Tuan Gooi Hsiao-Leung [Alor Setar] minta **MENTERI PERTANIAN DAN INDUSTRI ASAS TANI** menyatakan butiran terkini berapa jumlah isi rumah atau keluarga mengikut setiap negeri dalam senarai e-Kasih yang berhak menerima 20kg beras percuma setiap bulan di bawah Program MyBeras.
61. PR-1341-L73522
Tuan Sim Chee Keong [Bukit Mertajam] minta **MENTERI DALAM NEGERI** menyatakan statistik jenayah indeks dan bukan indeks ikut pecahan jenis, kaum, warganegara, umur, gender, negeri setiap satu bagi mangsa dan pemangsa.
62. PR-1341-L72698
Tuan Teo Kok Seong [Rasah] minta **MENTERI KOMUNIKASI DAN MULTIMEDIA** menyatakan bilangan dan kos pencetakan buku penjelasan 1MDB dan Himpunan Baju Merah yang diedarkan oleh Jabatan Hal Ehwal Khas (JASA).
63. PR-1341-L72412
Tuan Liew Chin Tong [Kluang] minta **PERDANA MENTERI** menyatakan statistik lokomotif dan koc keretapi biasa, ETS dan KTM Komuter. Antaranya, berapakah yang dapat berfungsi dan tidak dapat berfungsi. Berapakah peruntukan untuk meningkatkan dan membeli lokomotif baru.

64. PR-1341-L73366
Dato' Dr. Nik Mazian bin Nik Mohamad [Pasir Puteh] minta **MENTERI SUMBER ASLI DAN ALAM SEKITAR** menyatakan apakah perancangan Kementerian untuk membasmi pencemaran alam sekitar dan aktiviti yang menjejaskan ekosistem seperti isu bauksit dan penebangan pokok terlalu banyak untuk keuntungan dan pembangunan hartanah komersial.
65. PR-1341-L71980
Tuan Ng Wei Aik [Tanjong] minta **MENTERI PENGANGKUTAN** menyatakan sama ada Malaysia berupaya menyumbang A\$100 juta (RM300 juta) terhadap usaha-usaha mencari pesawat MAS MH370 yang hilang di bawah laut yang diterajui oleh negara Australia. Adakah usaha-usaha tersebut akan terjejas sekiranya Malaysia menghadapi masalah dalam memberi sumbangan kewangan tersebut.
66. PR-1341-L73614
Tuan Haji Ahmad Lai bin Bujang [Sibuti] minta **MENTERI LUAR NEGERI** menyatakan jumlah warganegara Malaysia yang dilaporkan hilang di luar negara sejak 2010-2015 dan apakah langkah yang diambil untuk mengesan warganegara yang hilang tersebut.
67. PR-1341-L71875
Dato' Johari bin Abdul [Sungai Petani] minta **PERDANA MENTERI** menyatakan :-
- (a) semasa berlakunya tsunami di Kota Kuala Muda, Kedah pada 26 Disember 2004, 75 buah rumah hilang dan 128 alami kerosakan teruk, 60 buah bot dan sampan hilang dan rosak. Kerajaan telah tubuhkan Tabung bagi mengutip derma dari semua pihak. Berapakah kutipan yang terkumpul; dan
 - (b) senaraikan secara terperinci bagaimana peruntukan Kerajaan dan derma dari pelbagai pihak digunakan dan siapa yang mendapat faedahnya.
68. PR-1341-L72878
Tuan Lim Lip Eng [Segambut] minta **PERDANA MENTERI** menyatakan apakah penambahbaikan atau pembaharuan Parlimen telah dilaksanakan setakat ini.
69. PR-1341-L72018
Tuan Hee Loy Sian [Petaling Jaya Selatan] minta **PERDANA MENTERI** menyatakan :-
- (a) siapakah penderma dan tujuan wang RM2.6 bilion yang dimasukkan ke akaun peribadi YAB Perdana Menteri dan jumlah yang sudah digunakan; dan
 - (b) berapakah baki yang telah dipulangkan dan apakah mekanismenya.

ATURAN URUSAN MESYUARAT DAN USUL-USUL

1. **Usul dibuat oleh Yang Berhormat Tuan Haji Ahmad Lai bin Bujang [Sibuti] dan masalah dicadangkan :-**

“ Bahawa suatu ucapan yang tidak sepertinya dipersembahkan kepada Seri Paduka Baginda Yang di-Pertuan Agong, demikian bunyinya:-

“ Ampun Tuanku,

Patik, Yang di-Pertua dan Ahli-ahli Dewan Rakyat Malaysia di dalam Persidangan Parlimen, memohon ampun mempersembahkan suatu ucapan yang ikhlas daripada Majlis Dewan Rakyat mengucapkan berbanyak-banyak syukur dan menjunjung kasih kerana Titah Ucapan Seri Paduka Baginda semasa membuka Penggal Keempat, Parlimen Yang Ketiga Belas.”

Menyambung semula Perbahasan atas masalah (9 Mac, 2016)

- | | | | |
|----|----------------|--|-------------------------------|
| 2. | (D.R. 36/2015) | Rang Undang-undang Keselamatan Sosial Pekerja (Pindaan) 2015 | Bacaan Kali Yang Kedua |
| | | [Menteri Sumber Manusia] | |
| 3. | (D.R. 30/2015) | Rang Undang-undang Syarikat 2015 | “ |
| | | [Menteri Perdagangan Dalam Negeri, Koperasi dan Kepenggunaan] | |
| 4. | (D.R. 29/2015) | Rang Undang-undang Skim Kepentingan 2015. | “ |
| | | [Menteri Perdagangan Dalam Negeri, Koperasi dan Kepenggunaan] | |
| 5. | (D.R. 34/2015) | Rang Undang-undang Dadah Berbahaya (Langkah-Langkah Pencegahan Khas) (Pindaan) 2015. | “ |
| | | [Menteri Dalam Negeri] | |
| 6. | (D.R. 37/2015) | Rang Undang-undang Profesion Undang-undang (Pindaan) 2015 | “ |
| | | [Menteri di Jabatan Perdana Menteri] | |

7. (D.R. 39/2015) Rang Undang-undang Kanak-Kanak “
(Pindaan) 2015
**[Menteri Pembangunan Wanita,
Keluarga dan Masyarakat]**
8. (D.R.9/2015) Rang Undang-undang Kanun Tatacara “
Jenayah (Pindaan) 2015
[Menteri di Jabatan Perdana Menteri]
9. (D.R.12/2015) Rang Undang-undang Keterangan “
(Pindaan) 2015
[Menteri di Jabatan Perdana Menteri]
10. (D.R.35/2015) Rang Undang-undang Persaingan “
(Pindaan) 2015
**[Menteri Perdagangan Dalam Negeri,
Koperasi dan Kepenggunaan]**

11. PR-1341-U72985
Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa pembangunan infrastruktur di negeri Sabah masih jauh ketinggalan berbanding dengan negeri-negeri lain di Malaysia. Dan mengambil maklum juga bahawa negeri Sabah memerlukan lebih banyak dana demi untuk membangunkan kemudahan infrastruktur terutama sekali di kawasan luar bandar serta keperluan-keperluan lain seperti masalah tebatan banjir, projek perumahan rakyat termiskin dan lain-lain. Dan mengambil maklum juga bahawa rakyat negeri Sabah juga beraspirasi seperti rakyat negeri Sarawak, sepertimana yang dinyatakan oleh YAB Tan Sri Adenan Satem (Ketua Menteri Sarawak) ingin memohon agar royalti minyak dapat dinaikkan kepada kadar 20%. Dan mengambil maklum juga, sekiranya royalti minyak dinaikkan pada kadar 20%, maka dengan lebihan dana tersebut, kerajaan negeri Sabah akan dapat melaksanakan keperluan-keperluan di atas dengan lebih baik dan cepat lagi. Maka, bagi meredakan rungutan dan tuntutan rakyat negeri Sabah, maka Dewan yang mulia ini hendaklah mengambil ketetapan bahawa Kerajaan Malaysia menaikkan kadar royalti minyak bagi negeri Sabah kepada kadar 20% dan sekaligus membolehkan negeri Sabah membangun dengan lebih pesat lagi."

[Perdana Menteri]

12. PR-1341-U73002

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa kesesakan Jalan Putatan merupakan rungutan hampir setiap pengguna jalan tersebut. Dan mengambil maklum juga bahawa Jalan Putatan merupakan sebahagian daripada rangkaian Jalan Pan Borneo Highway yang mana sepatutnya mendapat perhatian utama dan bebas kesesakan. Dan mengambil maklum juga, bahawa kesesakan Jalan Putatan juga disebabkan rekabentuk yang kurang baik di mana terdapat terlalu banyak U-Turn dan simpang, yang menjadi penyebab utama kelancaran aliran trafik selain menjadi punca kemalangan. Dan mengambil maklum juga, bahawa kesesakan Jalan Putatan dapat diatasi dengan membina sebatang Jalan Pantai (Coastal Highway) alternatif yang menghubungkan pekan Tanjung Aru dengan Pekan Kinarut. Dan mengambil maklum juga bahawa, sekiranya jalan pantai alternatif yang dimaksudkan dibina, ianya juga boleh membantu untuk mengelakkan hakisan pantai di sepanjang laluan tersebut. Dan mengambil maklum juga bahawa, untuk membina jalan baru sebagai laluan alternatif bagi Jalan Putatan akan menelan belanja yang besar terutama sekali bagi tujuan pampasan tanah yang dilalui. Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah membina jalan pantai alternatif bagi Jalan Putatan demi untuk keselesaan rakyat yang menggunakan laluan tersebut."

[Menteri Kerja Raya]

13. PR-1341-U73023

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa keengganan Kerajaan Persekutuan untuk mengiktiraf keputusan Peperiksaan Unified Examination Certificate (UEC) telah menimbulkan banyak kontroversi dan masalah terutama sekali kepada pelajar dan ibu/bapa pelajar yang terlibat. Dan mengambil maklum juga bahawa Negeri Sarawak merupakan negeri pertama di negara ini yang mengiktiraf keputusan peperiksaan UEC sepertimana yang diumumkan oleh YAB Tan Sri Adenan Satem dan sekali gus membolehkan pelajar terlibat meneruskan pengajian mereka dengan tanpa halangan di negeri Sarawak, misalnya di Universiti Malaysia Sarawak. Dan mengambil maklum juga bahawa dengan keengganan Kerajaan Malaysia untuk mengiktiraf keputusan peperiksaan UEC, pelajar yang terlibat terpaksa meneruskan pendidikan mereka di luar negara dan seterusnya bekerja serta menetap di luar negara adalah merupakan kerugian besar negara sebagaimana yang ditekankan oleh YAB Ketua Menteri Sarawak. Dan mengambil maklum juga, bahawa ramai pelajar dan ibu/bapa menganggap bahawa polisi untuk tidak mengiktiraf keputusan peperiksaan UEC ini bersifat diskriminasi di mana pelajar tersebut tidak berpeluang untuk berkhidmat dengan sektor awam di Malaysia."

Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah mengiktiraf keputusan peperiksaan Unified Examination Certificate bagi membolehkan pelajar yang terlibat meneruskan pendidikan mereka di negara ini serta berkhidmat di sektor awam di negara ini."

[Menteri Pendidikan]

14. PR-1341-U73036

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa kualiti air Sungai Sembulan adalah amat tercemar dan tidak sihat sama ada bagi hidupan marin mahupun bagi ekosistem marin negara ini. Dan mengambil maklum juga bahawa Sungai Sembulan merupakan rangkaian akhir aliran air dari beberapa siri saliran dan parit daripada beberapa taman perumahan yang berpenduduk padat, sebelum aliran air dilepaskan ke laut. Dan mengambil maklum juga bahawa kebanyakan sistem merawat air kumbahan yang ada di kawasan perumahan yang terlibat tidak lagi efisien untuk merawat air kumbahan tersebut sebelum dilepaskan ke saliran-saliran atau parit-parit yang akhirnya mengalir ke Sungai Sembulan sebelum berakhir ke laut. Dan mengambil maklum juga bahawa sebahagian besar terumbu karang di sekitar perairan negeri Sabah telah musnah disebabkan oleh aktiviti manusia seperti pelepasan air kumbahan yang tidak terawat ke laut. Diketahui bahawa kemusnahan terumbu karang (Coral Bleaching) merupakan satu daripada penyebab utama pemanasan global. Dan mengambil maklum juga bahwa negara Malaysia adalah merupakan salah sebuah negara penyokong dan pendokong gerakan United Nation Environment Programme (UNEP) sesuai dengan deklarasi Global Climate Change Conference, Copenhagen 2009. Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah menyediakan satu dana khas bagi tujuan pembinaan loji rawatan air kumbahan di sekitar Sungai Sembulan sebelum air sungai tersebut dilepaskan ke laut bagi menyelamatkan ekosistem laut negara ini."

[Menteri Sumber Asli dan Alam Sekitar]

15. PR-1341-U71877

Tuan M. Kulasegaran [Ipoh Barat] akan mencadangkan:-

"Bahawa Dewan ini hendaklah mengambil maklum bahawa rang undang-undang harus digubal untuk mengelakkan kes penukaran agama kanak-kanak di bawah umur secara unilateral dengan adanya penguatkuasaan undang-undang yang sewajarnya serta berpadanan dengan nasihat Kabinet pada 2009 iaitu kanak-kanak dikekalkan agama asal mereka sebelum penukaran agama itu berlaku."

[Perdana Menteri]

16. PR-1341-U73419

Dr. Tan Seng Giaw [Kepong] akan mencadangkan:-

"Bahawa Dewan akan membincangkan keberkesanan Malaysia mencegah serangan ganas."

[Menteri Dalam Negeri]

17. PR-1341-U71858

Tuan Fong Kui Lun [Bukit Bintang] akan mencadangkan:-

"Bahawa Kerajaan mempergiatkan usaha untuk menyatupadukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 58 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi negara secara bersama dan merealisasikan impian Malaysia."

[Perdana Menteri]

18. PR-1341-U71862

Tuan Fong Kui Lun [Bukit Bintang] akan mencadangkan:-

"Bahawa Kerajaan memulihkan pilihan raya kerajaan tempatan seluruh negara supaya urus tadbir Kerajaan menjadi lebih cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat."

[Menteri Kesejahteraan Bandar, Perumahan dan Kerajaan Tempatan]

19. PR-1341-U71883

Dato' Johari bin Abdul [Sungai Petani] akan mencadangkan:-

"Bahawa Dewan ini mengambil maklum serta menyedari bahawa Lembaga Tabung Haji adalah sebuah institusi kewangan yang penuh dengan kejayaan dan amat membanggakan rakyat Malaysia khususnya umat Islam. Institusi ini juga menjadi contoh untuk negara Islam yang lain ikuti. Maka ianya mesti dijaga dengan penuh ketelusan dan amanah. Sebarang penyelewangan wajib diambil tindakan pantas dan menyeluruh dan jika ianya runtuh maka orang yang mesti dipersalahkan ialah Perdana Menteri."

[Perdana Menteri]

20. PR-1341-U71884

Dato' Johari bin Abdul [Sungai Petani] akan mencadangkan:-

"Bahawa Dewan ini mengambil maklum bahawa Yayasan Pembangunan Ekonomi Islam Malaysia (YaPEIM) sebuah pertubuhan yang mendapat sokongan umat Islam di Malaysia."

Yayasan ini tertegak dengan niat yang penuh suci bagi membangunkan ekonomi umat Islam di samping menolong mereka yang tidak bernasib baik. Oleh sebab itu sokongan berterusan dari individu dan institusi kepada Yayasan ini membuktikan umat Islam negara ini amat prihatin dengan apa yang terjadi dalam masyarakat Islam. Tetapi membiarkan segelintir individu mengambil kesempatan dari kejayaan Yayasan ini hendaklah dikutuk sekeras-kerasnya. Tindakan lembab oleh Menteri dan Kerajaan dalam memantau perjalanan kewangan Yayasan ini juga harus menerima celaan. Sepatutnya semua pihak yang membelanjakan wang YaPEIM bukan pada tempatnya walaupun 'legally right' tetapi tetap 'morally wrong', mesti bertanggung jawab dan meletakkan jawatan atas kadar segera."

[Perdana Menteri]

21. PR-1341-U71886

Dato' Johari bin Abdul [Sungai Petani] akan mencadangkan:-

"Bahawa Dewan ini mengambil maklum kehidupan rakyat makin dihipit dengan harga barangan yang makin naik dan tidak terkawal akibat pengenalan cukai GST dan pengecilan nilai Ringgit. Semua rakyat di setiap lapisan masyarakat amat merasai keadaan ini. Kerajaan harus bertindak berani seperti yang pernah dilakukan oleh Mantan Perdana Menteri Tun Dr Mahathir Mohamad bila negara menghadapi masalah ekonomi yang mencemaskan pada penghujung tahun 90an. Tindakan utama yang mesti diambil sekarang ialah dengan mengurangkan perbelanjaan di Jabatan Perdana Menteri dan Kerajaan mesti mengamalkan sikap berjimat cermat di semua peringkat pentadbiran negara."

[Menteri Kewangan]

22. PR-1341-U71888

Dato' Johari bin Abdul [Sungai Petani] akan mencadangkan:-

"Bahawa Dewan ini menggesa Kementerian Pendidikan mengambil langkah-langkah segera supaya pelajar-pelajar kita mempunyai pengetahuan dan kebolehan bertutur dalam banyak bahasa terutamanya Bahasa Inggeris, Arab dan Mandarin akan membantu pelajar-pelajar kita bila meninggalkan alam persekolahan dan universiti nanti. Bahasa ini amat luas digunakan dalam kegiatan harian dan perniagaan dalam negeri dan luar negara. Majikan pasti akan mengambil pekerja yang berkebolehan lebih dari satu bahasa, kerana ianya akan menguntungkan majikan dalam banyak aspek. Ketiga-tiga bahasa ini bukanlah sesuatu yang asing bagi kita. Kerajaan harus melihat bagaimana mengintegrasikan pengajaran bahasa-bahasa ini ke dalam sistem pendidikan yang sedia ada. Bayangkan seorang anak Malaysia fasih berbahasa Inggeris, Arab, Mandarin dan dapat mengungkapkan Bahasa Malaysia yang teratur. Sayang sekali apa yang kita sedia ada tidak dimanfaatkan untuk generasi akan datang."

[Menteri Pendidikan]

23. PR-1341-U71890

Dato' Johari bin Abdul [Sungai Petani] akan mencadangkan:-

"Bahawa Dewan ini mengambil maklum data jumlah pendatang asing yang berdokumen dan tidak berdokumen akan berbeza dari satu agensi kerajaan dengan agensi yang lain. Malah Menteri sendiri menjawab dalam Dewan Parlimen dengan menggunakan perkataan "ini anggaran". Ini bermaksud tiada siapa yang mempunyai data sebenar tentang berapa jumlah Bukan Rakyat Malaysia yang berada di sini. Ini amat membahayakan negara. Kerajaan mesti mengambil tindakan yang berterusan bagi mendaftar mereka yang tidak berdokumen. Tindakan mendaftar dengan mengambil tindakan undang-undang terhadap mereka adalah dua perkara yang berbeza. Yang penting adalah setiap manusia yang berada di negara ini mesti mempunyai dokumen. Tindakan segera mesti diambil dan mestilah berterusan."

[Menteri Dalam Negeri]

24. PR-1341-U72582

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gejala pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu dketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama."

[Menteri Kesejahteraan Bandar, Perumahan dan Kerajaan Tempatan]

25. PR-1341-U72584

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan."

[Menteri Dalam Negeri]

26. PR-1341-U72589

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia."

[Menteri Pendidikan]

27. PR-1341-U72617

Tuan Chua Tian Chang @ Tian Chua [Batu] akan mencadangkan:-

"Bahawa Dewan ini akan menggesa Kerajaan untuk menegakkan prinsip berkecuali sebagaimana yang ditetapkan dalam Non-Alliance Movement (NAM) dan menegaskan bahawa Malaysia tidak akan mengambil bahagian atau menghantar askar untuk menyertai gabungan tentera yang dipimpin Arab Saudi dalam serangan terhadap Yemen, Syria atau mana-mana negara di Timur Tengah."

[Menteri Luar Negeri]

28. PR-1341-U72624

Tuan Chua Tian Chang @ Tian Chua [Batu] akan mencadangkan:-

"Bahawa Dewan ini menggesa Kerajaan untuk membantu penganggur dengan menyediakan bantuan kewangan secara tunai sebanyak RM1200 sebulan untuk tempoh 3 bulan selepas diberhentikan. Skim ini membolehkan pekerja-pekerja yang menganggur menjamin sara hidup mereka sewaktu mencari pekerjaan baru."

[Menteri Sumber Manusia]

**RISALAT-RISALAT YANG DIBAWA KE DALAM MESYUARAT
(DEWAN RAKYAT)**

<u>TAHUN 2016</u>	<u>RISALAT/DOKUMEN</u>	<u>TARIKH DIBENTANGKAN</u>
DR. 1	Penyata Khas Jawatankuasa Pemilih Dewan Rakyat Yang Ketigabelas Menurut Peraturan Mesyuarat 76(2) Peraturan-Peraturan Majlis Mesyuarat Dewan Rakyat	10 Mac 2016
ST. 1	Laporan Tahunan Dan Penyata Kewangan Suruhanjaya Pengangkutan Awam Darat (SPAD) Bagi Tahun 2014	10 Mac 2016
ST. 2	Laporan Tahunan dan Penyata Kewangan Lembaga Promosi Kesihatan Malaysia Bagi Tahun 2014	10 Mac 2016
ST. 3	Laporan Tahunan Dan Penyata Kewangan Perbadanan PR1MA Malaysia bagi Tahun 2014	10 Mac 2016
ST. 4	Laporan Tahunan Dan Penyata Kewangan Lembaga Jurukur Tanah Bagi Tahun 2014	10 Mac 2016